

In nov dachasa per ils objects istorics da la Svizra

Affoltern am Albis daventa in center per l'istorgia Svizra

■ **(anr/vi) ler han ins inaugurà en preschientscha da cusseglier federal Pascal Couchepin il nov deposit dal Museum naziunal svizzer ad Affoltern am Albis. Finalmain chattan ils 800 000 objects istorics albiert sut il medem tetg.** Ils collavurats dal museum ed ils represchentants da la politica han festivà ier l'avertura dal deposit per la pli gronda collecziun istorica e culturala da la Svizra. Il nov center cumpiglia trais bajetgs, nua ch'i dat era labors, biros, ina biblioteca, in local da scolaziun ed ateliers per restaurats.

Il svilup dals ultims 100 onns


Anc avant tschient onns han tut ils collavurats dal Museum naziunal svizzer lavurà sut il medem tetg. I deva avunda plaz per far exposiziuns, per depots, lavuratori

e biros. Schizunt la scola d'artisanadi chattava albiert en il museum a Turitg. Ma gia ventg onns pli tard èsi vegnì stretg.

L'emprim ha la scola d'artisanadi stuì far plaz e plaunsieu han ins era tschertgà autras localitads per ils depots. La finala ha il museum naziunal gì deposits en set differents lieus, spattitschads en differents quartiers da Turitg. Igl era per part depots che na correspundevan betg pli a las pretensiuns d'ozendi da conservar rauba veglia. Plinavant han quests deposits era custà memia bler, sco'i resorta da las comunicaziuns da medias.

In arsenal vegl – in deposit nov

Cura ch'ins ha avert ad Affoltern am Albis in ulteriur depot en in vegl arsenal da l'armada, ha la confederaziun decidì d'investar en



En quest bajetg ad Affoltern am Albis po il museum naziunal uss conservar a moda moderna ses objects. MAD

quest lieu 30 milliuns en in nov deposit central per il Museum naziunal svizzer. En il conturn da l'arsenal han ins realisà bajetgs e localitads per deponer la collecziun dal museum naziunal, ma era

per ils labors, lavuratori ed ils ateliers dals conservats. Quai tut ha uss puspè plaz sut il medem tetg.

Il museum ha da preschent 800 000 objects ch'el ha rimnà entaifer ils ultims tschient onns.

La gronda part da quests objects è gia ad Affoltern, ma fin che tut è en il nov dachasa vai anc fin la proxima primavera, uschia che l'entira bardigliada vegn ad avair cuzzà radund dus onns.

Mintga singul object vegn gist era fotografà danovamain, registrà a moda digitala e marcà cun in code da stritgs. Uschia pon ils curats decider pli svel, tgenins exponats ch'ins vul duvrar per singulas exposiziuns, ed ins na sto betg pachetar en ed ora ils objects tantas giadas.

Di da las portas avertas

La sonda proxima avra il museum naziunal davent da las 10.00 fin las 17.00 las portas dal deposit per la populaziun interessada. I vegn purschì guidadas concernent l'architettura dal nov bajetg, ma ins po era s'infurmar davart la collecziun da porzellan, d'armas e da mobiglias. I dat in program per uffants ed ils conservats explitgeschan en plirs referats lur tecnicas da mantegnair ils objects.